
SIARAN MEDIA
3 Jun 2025

ECoS-ILTP Pelonjak Tenaga Mahir Sabah

KOTA KINABALU, 3 Jun – Energy Commission of Sabah (ECoS) telah menganjurkan Program Inspirasi Bersama ECoS bertempat di Institut Latihan Teknik dan Perdagangan (ILTP), sebagai kesinambungan kepada pemeteraian Memorandum Persefahaman (MoU) antara ECoS dan ILTP yang ditandatangani.

Program Inspirasi TVET Angkat ECoS-ILTP, yang diadakan di Kampus ILTP telah dirasmikan oleh Ketua Pegawai Eksekutif ECoS, Datuk Ir. Abdul Nasser Abdul Wahid dan bertujuan merapatkan lagi jalinan strategik antara kedua-dua institusi, khususnya dalam memperkasakan pendidikan dan latihan teknikal (TVET) berkaitan sektor tenaga di Sabah.

Menurut Nasser, pengiktirafan ILTP sebagai Institusi TVET Angkat ECoS yang pertama merupakan satu langkah penting dalam membentuk ekosistem tenaga negeri yang mampan dan berdaya saing. Program ini juga menjadi medium untuk menyampaikan maklumat tepat mengenai peranan ECoS kepada para pelatih yang merupakan bakal tenaga kerja mahir masa depan negeri.

“Tenaga untuk masa depan bermula dengan anda hari ini,” katanya, sambil menyeru para pelatih agar mengambil peluang untuk memahami lebih mendalam tentang realiti industri tenaga serta cabaran dan peluang yang wujud.

Nasser juga mengambil kesempatan melihat perkembangan bagi menaiktaraf program latihan-latihan kekompetenan elektrik dan cadangan tapak bagi program kekompetenan gas.

Melalui kerjasama ini, ECoS dan ILTP akan berkerjasama dalam memperkasa latihan kemahiran dalam bidang tenaga serta memperluas jaringan dengan pemain industri, dan meningkatkan kebolehpasaran graduan TVET tempatan.

Program ini turut dihadiri oleh Ketua Penolong Pengarah JPSM, Puan Zulaikha, pegawai-pegawai ECoS serta barisan pengurusan dan tenaga pengajar ILTP.

Dengan pelaksanaan program seperti ini, ECoS yakin bahawa sinergi yang terjalin bersama ILTP akan melonjakkan pembangunan modal insan tempatan dan menyokong agenda pembangunan tenaga negeri Sabah.

[tamat]

Mengenai ECoS

Suruhanjaya Tenaga Sabah (ECoS) adalah badan berkanun yang ditubuhkan oleh Kerajaan Negeri Sabah sejak 10 Januari 2023. Ia berfungsi sebagai pengawal selia untuk sektor tenaga dalam portfolio Ketua Menteri. Objektif utama ECoS adalah untuk memastikan tenaga yang selamat, mampan, mampu milik, dan mudah diakses untuk Negeri Sabah. ECoS memainkan peranan penting dalam membentuk landskap tenaga Sabah, menggalakkan amalan tenaga yang bertanggungjawab, dan melindungi kepentingan pengguna serta alam sekitar.